

Vuk'uzenzele

O e tlisediwa ke Ditlhaeletsano tsa Puso (GCIS)

English/Setswana

Seetebosigo 2022 Kgatiso 1

Baoki ba ntlha ba diphologolo mo Aforika Borwa ba a aloga

Allison Cooper

Go nna mongwe wa dialogane tsa ntlha mo nageng tsa baoki ba diphologolo ke phitlhelelo e kgolo go moagi wa Randburg, Phumelela Mthimkhulu, yo a nang le dingwaga di le 21, yo a saleng a nna le lerato la diphologolo go tloga a santse a le monnye.

Mthimkhulu o sa tswa go aloga kwa Yunibesithing ya Pretoria (UP), e leng yona setheo se le esi mo nageng sa katiso ya kalafi ya diphologolo mo nageng ya Aforika Borwa, ka gerata ya *Bachelor of Veterinary Nursing*.

“Ga ke dumele se matlho a se mpontshang. Go itse gore ke karolo ya setlhophisa ntlha se se dirileng gerata e, e leng sengwe se se tsereng dingwaga se rulaganngwa, e tota e le tlotlo e kgolo thata mo go nna.

“Ke itumelela ditshono le dikgoro tse di tla re bulegelang jaaka baoki go tsweletsa dithuto tsa rona le go nna baitseanape mo teng

ga porofesene e ya rona, e leng sengwe se se neng se se bonolo mo nakong e e fetileng,” a rialo.

Tamarin Fisher, Moporesitante wa Mokgatlo wa Aforika wa Baoki ba Diphologolo, a re se ke phitlhelelo e kgolo tota mo hisetoring ya porofesene e ya dingwaga tse 42.

“Gerata e ntshwa e ya dingwaga tse tharo e tla neela baoki ba ba alogileng tshono ya go ikwadisetse dithuto tsa morago ga gerata, e leng se se ka bakang go rebolwa ga digerata tsa *honours, masters* le *PhD*.”

Dingaka tsa diphologolo di alafa dikgobalo le malwetse a diphologolo fela jaaka ngaka e tlamela batho ka kalafi ya boitekanelo. Baoki ba diphologolo ba botlhokwa mo ditlhopheng tsa tiro tsa dingaka tsa diphologolo, ga rialo Mthimkhulu.

“Dingwe tsa dinonofo tse mooki a tshwanetseng go nna natso ke tlhokomelo ya molwetse, puisano le modirisi, go thusa dingaka tsa diphologolo ka ditiro, le sengwe le sengwe fela se se ka thusang gore bookelo ba diphologolo bo dire ka nonofo.

“Ke nngwe ya diporofesene tse di kgotsofatsang go gaisa.

Fa o batla go nna mooki wa diphologolo, se letle poifo kgotsa go tlhoka kitso go go kgoreletsa mo go lekeng le go e itumelela gonne e tlile go fetola botshelo jwa gago go nna bo bo botoka,” ga rialo Mthimkhulu.

Dibasari tse di leng teng go ema nokeng dikgato tsa go thiba phatlha ya bokgoni jono jo bo tlhaelang

Ka ntlha ya tlhalelo ya bokgoni mo lekaleng le, go nnile bonolo gore Mthimkhulu a bone tiro.

“Ke nnile

lesego ka go bona tiro kwa Bookelong ba Diphologolo ba Fourways mo ngwageng wa me wa bofelo. Ke simolotse go dira koo kgwedi morago ga go konosetsa ditlathobho tsa me tsa makgaolakang mme ke ntse ke itumelela motsotso mongwe le mongwe wa tiro e,” a rialo.

Bothati ba Thuto le Katiso ba Lekala la Boitekanelo le Katlaatlalelo (HWSETA) bo ineela go samagana le tlhalelo e e kwa godimo ya dinonofo mo lekaleng la kalafi ya diphologolo go netefatsa gore go nna le diphetogo.

Go sa le gale, bo thankgotse Letsholo la Kaedi ya Dithutego tsa Saense ya Kalafi ya Diphologolo ka semphato le Lefapha la Thuto e Kgolwane le Katiso, mme bo tla etela dikolo tsa kwa metsemagaeng go rotloetsa baithuti go tsaya ditirelo tsa kalafi ya diphologolo jaaka nngwe ya ditiro tsa borutegi.

E begile gape le dibasari



Phumelela Mthimkhulu ke yo mongwe wa baithuti ba ntlha ba go aloga mo dithutong tsa go nna baoki ba diphologolo ka fa nageng.


E tswela mo go tsebe 2



Eya go tsaya karata ya laesense ya gago ya go kgweetsa

Tsebe 2

BABALESEGAY
ENTA O BOLOKE AFORIKA BORWA
MMOGO RE KA FENYA MOGARE WA CORONA



Go itharabologelwa le go itlhotlhora mo ditshenyegelong tsa merwalela

Tsebe 3



Go buisa Vuk'uzenzele tsenya epe ya GOVAPP e o ka e fitlhelang mo go:



Morago o batle SA Government mo go Google playstore kgotsa mo go appstore

IKGOLAGANYE LE RONA MO GO

Vuk'uzenzele

@VukuzenzeleNews

Diwebesaete ke: www.gcis.gov.za Imeile ke: vukuzenzele@gcis.gov.za
www.vukuzenzele.gov.za Mogala ke: (+27) 12 473 0103

Tshedimosetso House:

1035 cnr Frances Baard and Festival streets, Hatfield, Pretoria, 0083

VUK'UZENZELE KE MAHALA, GA E REKISIWE

E tswela go tswa mo go tsebe 1

di le 60 go samagana le tlhokego e e kwa godimo ya dingaka tsa diphologolo le bathusi ba dingaka tsa diphologolo kwa metsema-gaeng a Aforika Borwa.

“Dibasari tse di lebisitswe bogolo go baithuti ba kwa metsemagaeng ka ntlha ya fa ba ka tsaya kitso e mme ba e dirise kwa magaeng a bona,” ga rialo Ngaka Nomfundo Mnisi, Monnasetilo wa HWSETA.

Motlatsatona wa Thuto e Kgolwane, Saense le Boitlhamelo, Buti Manamela, o amogetse dibasari tse.

Lefapha la Kalafi ya Diphologolo la UP le tla thusa HWSETA ka matsholo a yona a papatso, matlole a dibasari le a go thapa.

“Re tla thusa HWSETA gape ka go tsamaisa dibasari, tse di neng di neetswe baithuti ba ngwaga wa ntlha ba disaense tsa kalafi ya diphologolo go tswa mo

ditlhopheng tse di tlhao-tsweng,” ga rialo Chris van

“Ke itumelela ditšhono le dikgoro tse di tla re bulegelang jaaka baoki go tswela dithuto tsa rona le go nna baitseanape mo teng ga porofesene e ya rona, e leng sengwe se se neng se se bonolo mo nakong e e fetileng.”

Blerk, Tlhogo ya Ditlhaele-tsano le Bobegakgang kwa Lefapheng la Saense ya Diphologolo kwa UP.

O rile baithuti ba ba ratang go ka gata mo dikgatong tsa ga Mthimkhulu le go

ikwadisetsa gerata ya ntlha kwa UP ba tlhoka go bo ba konoseditse Setifikeiti sa Bosetšhaba sa Materiki (NSC), kgotsa thutego e e lekanang naso, le go kgo-tsofatsa ditlhoeko tse di maleba.

“Mo ntlheng ya gerata ya Booki ba Diphologolo, ba tlhoka bonnye Maduo a Kamogelo a le 28 gammogo le NSC ka Seesimane Puo ya Gae kgotsa Seesimane Puo ya Ntlha ya Tlaleletso, dipalo-tharabololo, le bonetetshi kgotsa saense ya thutabo-tshelo,”

Go bona tshedimosetso ka botlalo ka ga lekala le, bašwa ba ka ikgolaganya le ditirelo tsa poraefete tsa kalafi ya diphologolo kgotsa go buisana le dingaka tsa diphologolo tsa tirelosetšhaba ya pateletso (CCS) ba e leng karolo ya Lefapha la Temothuo, Thulaganyo ya Lefatshe le Tlhabololo ya Metsemagae (DALRRD) go ralala naga.

“Maitlhommo a lenaneo

la CCS ke go tlamela ka ditirelo tse di fitlhelelang e bile di le tlhwatlwatlase tsa kalafi ya diphologolo kwa mafelong a a tlae-lang ditirelo le a a nang le ditirelo tse di boko a tsa

thuso mo nageng ya Aforika Borwa. Ka jalo, dingaka tsa diphologolo mo lenaneong le ka gale ke bona ba ba nang le tshedimosetso e e botlhokwa mo ntlheng eno,” ga rialo Van Blerk.

Tsela ya go dira kopo

Go dira kopo ya nngwe ya dibasari tse dintšhwa tse, ba ba batlang go nna baithuti ba tshwa-netse go dira kopo ya Gerata ya Saense ya Diphologolo le Gerata ya Booki ba Diphologolo kwa UP (go itlhophela dithuto tse ba batlang go ithutela tsona mo go tsona ka bobedi) ka mokgwa wa mafaratlhatlha a inthanete mo go www.up.ac.za/online-application. Badirakopo ga ba a tshwanela go dira kopo ka tlhamalalo kwa HWSETA.

Letlha la go tswela dikopo ke 30 Seetebosigo. Go bona tshedimosetso ka botlalo ka ga dithuto tsa saense ya diphologolo mo teng ga UP, etela www.up.ac.za/faculty-of-veterinary-science.

Go bona tshedimosetso ka botlalo ka ga dibasari tse dingwe tse di leng teng mo lekaleng le, etela www.up.ac.za/faculty-of-veterinary-science/article/33926/bursaries-for-veterinary-science-studies.

Eya go tsaya karata ya laesense ya gago ya go kgweetsa

Bakgweetsi ba ba dirileng dikopo tsa karata ya laesense ya go kgweetsa kgotsa phemiti e ntšhwa ya go kgweetsa ya porofesinale (PrDP) kgotsa e o e ntšhwafaditseng magareng ga Diphalanane le Sedimonthole ngogola go ikuelwa mo go bona gore ba tle go di tsaya.

Go ya ka Koporasi ya Taolo ya Pharakano ya Tsela (RTMC), mo dilae-senseng tsotlhe tsa go kgweetsa tse di kopilweng di le 32 748 tse di tlhagisi-tsweng mo pakeng eno, go setse go tserwe di le 42%.

Tona ya Dipalangwa, Fikile Mbalula, o butse ditikwatikwe tsa dilae-sense tsa RTMC kwa Midrand le Eco Park ngogola, go samagana le tshalelomorago ya

dilaesense tsa go kgweetsa tse di feletsweng ke nako ka ntlha ya COVID-19.

Akhaonto ya Dikarata tsa Laesense ya go Kgweetsa, e e gatisang dilae-sense, e semeletse go itlhaganedisa tlhagiso mme e tswela go nna mo dinakong go ka fedisa tshalelomorago e mo mafelong a Seetebosigo.

RTMC ya re batho ba ka tlhola seemo sa kopo ya bona pele ba ya kwa tikwatikweng ya diteko go ya go e tsaya.

Se se ka dirwa ka SMS kgotsa mo webosaeteng.

Tshedimosetso mabapi le laesense ya gago ya go kgweetsa ka go romela SMS

Go tlhola gore laesense ya gago ya go kgweetsa e

tsamaya kae, modirakopo a ka romela nomoro ya ID ya gagwe ka SMS go 33214.

O tla amogela nngwe ya di-SMS tse di latelang:

- *Application received: The application was received, but has not yet been processed.*
- *Production queue: The card is still being processed and manufactured.*
- *Produced and ready for collection: The card will be ready for collection in 21 days. However, due to the high number of cards being processed, the RTMC advises you to wait 35 days before going to collect.*
- *Problem card: There is a problem with the production of your card. Please return to the testing centre.*

Go tlhola gore kopo ya gago ya PrPD e tsamaya

kae, romela nomoro ya ID ya gago mo go 44220.

Tshedimosetso mabapi le laesense ya gago ya go kgweetsa ka go dirisa mafaratlhatlha a inthanete

O ka dirisa gape le mafaratlhatlha a inthanete go tlhola gore kopo ya gago ya laesense ya go kgweetsa e tsamaya kae ntle le go duelela tirelo eno.

- Etela online.natis.gov.za.
- Dira porofaele mme o tsene mo go yona.
- Mo webosaeteng eno kgotla mo go bontshang gore o ka tlhola kopo ya gago mo teng.

Ba dilae-sense tsa bona di feletsweng ke nako magareng ga Mopitlwe 2020

le 31 Phatwe 2021, mme ba fetilwe ke letlha la go dintšhwafatsa ka la bo 5 Motsheganong 2022, ba rotloediwa go dira kopo ya laesense ya nakwana fa ba dira kopo ya go ntšhwafatsa go netefatsa gore ba tswela go ikobela melao.

Le fa ditikwatikwe tsa RTMC di bulwa Mosupologo go fitlha ka Latshipi go tloga ka ura ya bosupa mo mosong go fitlha ka ura ya borobongwe bosigo, baagi ba rotloediwa go dirisa Labotlhano le matsatsi a mo bofelong jwa beke ka ntlha ya fa mela e le me-khutshwane mo matsatsing ao.

Tshedimosetso eno o e tlisediwa ke ba RTMC.



government communications

Department: Government Communication and Information System
REPUBLIC OF SOUTH AFRICA

Tel: 012 473 0353

Email: vukuzenzele@gcis.gov.za

Address: Private Bag X745, Pretoria, 0001

Head of Editorial and Production
Regomoditswe Mavimbela
Regomoditswe@gcis.gov.za

Acting Editor-in-Chief
Zanele Mngadi | Zanelemngadi@gcis.gov.za

Acting Managing Editor
Tendai Gonese | tendai@gcis.gov.za

News Editor
Noluthando Motswai

Writer: More Matshediso

Graphic Designers
Tendai Gonese | Benny Kubjana

Production Assistants
Jauhara Khan | Sebastian Palmer

Language Practitioners
Nomgcibelo Motha | Boitumelo Phalatshe
Thandolunye Magudulela | Sizwe Ziqubu

All rights reserved. Reproduction of the newspaper in whole or in part without written permission is strictly prohibited.

Vuk'uzenzele
is published by Government Communications (GCIS)



Printed by:



Distributed by:





Go itharabologelwa le go itlhotlhora mo ditshenyegelong tsa merwalela

Esetse e ka nna dikgwedi tse pedi fa e sale merwalela e megolo e tlasela dikarolo tsa KwaZulu-Natal, Kapa Botlhaba le Bokone Bophirima, le go gogola le matshelo a batho a a seng kana ka sepe mmogo le go senya dithoto le mafaratlhatlha.

Go sale gale, ke ne ka etela eThekweni kwa KwaZulu-Natal go kopana le beng ba dikgwebo mo toropokgolong e le go ba neela tshegetso ya rona mo go busetseng ditiro mannong.

Fa mafelo ano a ne a welwa ke matlhotlhapelo a, go ne go na le pelaelo ya gore a bothati bo na le bokgoni kgotsa bo tla tsibogela ka tshwanelo le ka nonofo maemo a a utlwisang botlhoko ano a batho ba ba latlhegetsweng ke dithoto tsotlhe tsa bona.

Morago ga go etela toropokgolo eno lekgetlo la bobedi go latela gore le apanelwe ke merwalela, ke iponetse ka ame a mabedi gore pelaelo eno e ne e le e fosagetseng. Kwa KwaZulu-Natal, fela jaaka kwa Kapa Botlhaba le Bokone Bophirima, bannaleseabe botlhe ba ntse ba semeletse go busetsa maemo mannong go tswa mo ditiragalong tse di botlhoko tse.

Tikwatikwe ya Bosetšhaba ya Taolo ya Matlhotlhapelo e ntse e golaganya maphata otlhe a puso mo maitekong a yona a go thusa baagi ka ditirelo tsa ona tsa botho go malapa a mantsi a a amegileng. Go ntse go



itumedisa go bona ba lekala le e seng la puso, kgwebo le mekgatlo ya namolo e dira mmogo le puso go tlamela ka thuso ya namolo e tota e tlhokegang thata.

Bannaleseabe botlhe ba tlametse ka dijo, diaparo, dikobo, dipakana tsa seriti le diaparo tsa sekolo go malapa a a amegileng go fitlhelela ditlhokego tsa bona tsa motheo. Ditirelo tsa mafelobonno ga jaana di reboletswe batho ba feta 7 000 mo didikeng tse nne tse di amegileng go gaisa kwa KwaZulu-Natal. Go setse go simolotswe ka tiro ya go agela malapa a a amegileng mafelobonno a nakwana mo dikaro-

lwaneng tsa lefatshe la puso tse di supilweng kwa KwaZulu-Natal tse di siametseng khudugelo.

Lefapha la Merero ya Selegae, la Boitekanelo le la Thuso ya Baagi a ntse a thusa baagi ba ba amegileng go fitlhelela ditirelo tsa botlhokwa. Sekao, go na le dikantoro tse di tsamayang mo motseng tse di thusang ba ba latlhegetsweng ke ditokomane tsa botlhokwa mo merwaleleng gore ba kgone go reboletswa dikarata tsa boitshupo tse dišwa le makwalo a matsalo. Ditirelo tse di tsamayang motse ka motsana tsa boitekanelo, go akaretsa le tsa go tlhabela meento ya COVID-19, di

tlamelwa batho ba ba nnang mo mafelong a a iseng mo go ona ditirelo tseno di nne le meago mo go tsona. Go na le maano a a dirwang go duela megolo ya go thusa batho ba ba amegileng.

Go rekiwa diphaposi tsa nakwana gore thuto e se tswelele go kgoreletsega sebaka se se fetang tekano kwa dikolong tse di amilweng ke merwalela.

Tiro e a tswelela go baakanya ditiro tse di senyegileng tsa go tlhotlha ga metsi a a dirisitsweng, diteišene tse di pompang metsi le mafaratlhatlha.

Ditsela tse di senyegileng di a baakanngwa. Go logilwe maano a go aga maborogo a mašwa a le 18 jaaka karolo ya lenaneo la Maborogo a Metsemagae a Welisizwe.

Go nnile gape le tswelopele e e bonalang mo go baakanyeng mafaratlhatlha a botlhokwa a a tshegetsang Boemakepe ba Durban.

Ka ntlha ya botlhokwa ba boemakepe bo mo ikonoming ya bosetšhaba le ya kontinente, pharakano ya boemakepe e buseditse mannong, ditiragalo tsa dithemiale di dira ka botlalo mme tiro ya go baakanya mafaratlhatlha a diporo a a senyegileng e tswelela pele.

Go dirwa gape le ditsela tse dingwe tsa go tlamela ka tshegetso ya matlole go dikgwebo tse dikgolo le tse dinnye tse di leng ka fa tlase ga kgatelelo. Se se tlhokega ka bonako go netefatsa gore dikgwebo di tswelela

go dira le gore ditiro di tla tswelela go bolokiwa.

Mo dinakong tse di farologaneng tsa hisetori ya temokerasi ya rona, re ne ra lebagana le ditiragalo le maemo a a neng a leka tsepamo ya batho ba rona le nonofo ya ditheo tsa rona.

Re bone tirisano le tshegetso e e tseneletseng go baagi ba ba amegileng ba diporofense tsa KwaZulu-Natal, Kapa Botlhaba le Bokone Bophirima. Dipuso tsa mmasepala le porofense di ntse di dirisana mmogo le mafapha a bosetšhaba le ditheo go kgontsha batho go aga sešwa matshelo a bona le go busetsa ikonomi ya mafelo ano mannong.

Ba ntse ba dirisana le bannaleseabe botlhe mo mafelong otlhe a go netefatsa gore re momaganya maiteko a rona a poelomannong le gore re rulaganya le go aga sešwa ka tsela e e tla emelelanang le ditiragalo tse di masisi tsa mothale o mo isagong.

Boitshoko ba baagi ba ba amegileng, boineelo ba bona ba go tswelela le bokgoni ba bona ba go dira mmogo mo dinakong tse tsa tshisibalo e nnile thotloetso e kgolo. Re akgola botlhe ba ba nnileng karolo ya maiteko a go thusa batho mo diporofenseng tse di amegileng.

Jaaka puso, re dirisa tsotlhe tse re nang natso le go dirisa maiteko otlhe go netefatsa gore, jaaka re aga sešwa, ga go ope yo o tlogelwang kwa morago.